



Komunikadu Imprensa
Munisípiu Covalima
28 Fevereiru 2024

JSMP kontinua estende Programa Apoiu Seguransa Komunitáriu iha Suku Ogues liuhosi asina Nota Entedimentu

Iha 21 Fevereiru 2024, JSMP realiza tan seremónia asina Nota Entedimentu ho autoridade Suku Ogues, Postu Administrativu Maucatar, Munisípiu Covalima hodi estende Programa Apoiu Seguransa Komunitáriu (PASK) ba períodu fulan neen iha tinan 2024.

“Lori JSMP nia naran hakarak hato’o agradese ba xefe Suku Ogues ho estrutura tomak ne’ebé hakarak kontinua kolobora ho JSMP ba implementasaun Porgrama Apoiu Seguransa Komunitáriu. Antes ne’e, iha tinan 2023, JSMP konsege implementa ona programa ne’e no konsege prodús mós rezultadu balun hanesan hamutuk ho estrutura halo revizaun ba iha regra tara-bandu no reativa filafali regra refere ne’ebé antes ne’e la utiliza. Alende ne’e, fasilita comunidade sira asesu ba prosesu justisa formál,” dehan Sra. Flora Soriano Menezes, Kordenadora Unidade Peskizadór Legál no Unidade Treinamentu no Advokasia JSMP.

Administradór Postu Administrativu Maucatar, Sr. Laurentino de Jesus iha ninia intervensaun haktuir katak programa ne’ebé JSMP ho Suku Ogues implementa iha Suku Ogues ne’e di’ak tebes, nune’e husu ba konsellu suku sira atu serbisu hamutuk no koopera ho JSMP ba programa tuir mai.

Administradór mós apela ba konsellu suku sira atu serbisu ho ativu durante kontinuasaun ba implementasaun programa ne’e iha suku ne’e tanba konsidera programa ne’e di’ak tebes no bele kapasita comunidade hotu iha asuntu lei nian inklui hasa’e koñesimentu comunidade sira atu bele hatene sira nia direitu asesu ba justisa formál.

Entretantu, Komandante Polísia Eskuadra Postu Maucatar, Sra. Cecilia de Jesus iha nia intervensaun haktuir katak nu’udar Komandante Eskuadra Postu Maucatar sente orgullu no kontente ho programa JSMP nian ne’ebé maka hala’o ona iha tinan kotuk no kontinua ba tinan ida ne’e, nune’e nia parte prontu atu serbisu hamutuk ho ekipa JSMP durante fulan neen ba oin atu fasilita no apoiu comunidade sira iha suku Ogues liuliu oinsa atu asesu ba justisa formál tanba comunidade barak maka seidak iha koñesimentu oinsa atu asesu ba justisa formál.

Iha parte seluk, Xefe Suku Ogues, Sr. Febriano Pereira iha ninia intervensaun, haktuir katak nia parte kontente tebes ho prezensa JSMP nian ne’ebé kontinua nia programa ne’e ba fulan ne’en tanba programa ne’e pertene tebes ba comunidade Suku Ogues. Ho tulun JSMP nian bele mós

ajuda lider lokál sira oinsa atu halo mediasaun no rezolve problema sira ne'ebé maka bele resolve iha nivel komunitaria.

Alende ne'e, xefe suku hatutan katak programa JSMP nian ne'e mós bele ajuda konsellu suku sira ho edukasaun sívika, dialogu komunitáriu, *follow-up* kazu sira no mós konsellu legál.

Xefe suku rekoñese katak durante tinan ida JSMP serbisu hamutuk ho suku Ogues, iha progresu lubuk ida ne'ebé consege atinji maka hanesan halo revizaun ba Regra Tara-bandu no reativa filafali Regra Tara-bandu ne'e iha tinan kotuk.

Programa ne'e ho nia objetivu mak atu tulun komidade lokál sira no intervenente sira iha sistema justisa nasional hodi hadi'ak ligasaun entre sistema sira no mós hadi'ak justisa ida ne'ebé justu no ema hotu-hotu bele asesu iha nivel komunitáriu, ho atividade sira mak hanesan:

1. Observa prosesu rezolusaun disputa komunitáriu no hala'o peskiza lokál
2. Fornese informasaun hodi tulun halo revizaun ba iha Regra Tara-bandu
3. Fahe informasaun kona-ba progresu kazu sira hosi polísia, tribunál, prokuradória ba iha suku sira tarjetu
4. Advokasia atu hadi'ak liután ligasaun komidade sira ho justisa formál
5. Fahe informasaun kona-ba asesu ba sistema justisa formál
6. Sei introdús *Case Log* ba Konsellu suku sira no OPS kona-ba oinsa atu priense formulariu kazu sira.

MoU ne'e asina hosi Kordenadora Unidade Peskizadór Legál no Unidade Treinamentu no Advokasia, Sra. Flora Soriano Menezes no Xefe Suku Ogues, Sr. Febriano Pereira. Seremónia asinatura ne'e, akompaña hosi Administradór Postu Administrativu Maucatar, Sr. Laurentino de Jesus, Komandante Eskuadra Maucatar, Sra. Cecilia de Jesus no akompaña mós hosi xefe aldeia sira hosi aldeia lima (5), lia-nain, delegadu/a, representante juventude feto no mane, Mediadór Postu sira hosi Ministériu Interiór.

Atividade ne'e, realiza hosi JSMP liuhosi Programa Apoiu Seguransa komunitária (PASK) tanba serbisu hamutuk ho The Asia Foundation (TAF) ne'ebé finansia hosi Embaixada Nova Zelândia iha Timor -Leste.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl

